

Dum NASK 2008 ...



... naskiĝis multaj novaj talentoj.

Ili faris ĉiujn taskojn, ifoje pene
sed plej ofte vigle kaj
bonhumore.



Ni kune multe amuziĝis
kaj ludis,



kaj akompanis unu la alian
ĝis la fino de la kurso.

Nun ĉiuj sukcese ricevis sian diplomon!



Ni kune dankas al ĉiuj
pro la bonegaj etoso
kaj kunlaboro!



Ĝis la revido!



Birke & Berke

NASKa blogo!

Dum la pasintaj tri semajnoj ni amasigis veran trezoron de fotoj kaj son-registraĵoj el niaj eksterklasaj programoj. En la venontaj monatoj mi provos pretigi la diversajn materialojn, iom post iom aperigante ilin en nova, oficiala blogo de NASK—eble kun kelkaj el viaj belaj kontribuoj al la *Fasko*. La blogo servos du ĉefajn celojn: por dividi inter ni memorindaĵojn el la pasinta somero, kaj kompreneble por sciigi la mondon pri NASK! Vizitu ĝin, je:

<http://naskesperanto.wordpress.com>

Korajn dankojn al vi, karaj amikoj; mi vere ĝuis nian tempon kune!
—Hoss

Solvoj de lastatempaj enigmoj:

Krucvorto:

Vertikalaj:

1. JURNALO
2. KROKODILO
3. KAJTO
4. KATO
5. KNABO
6. KAKTO
9. KRONO
10. KORO

Horizontalaj:

2. KUKO
4. KLAŬNO
7. KOMPUTILO
8. INDIANO
10. KAMELO
11. KOLOMBO
12. KRAJONO

Kalemburo: "SIN-TAKSO"

Mia opinio pri la alta valoro de NASK

Antaŭe mi sentis ke mi sufiĉe lernis Esperanton kaj mi partoprenis multajn UK-ojn kaj komunikis kaj interparolis kun multaj gesamideanoj, tamen, post la kurso de NASK, mi sentas ke restas multo kion mi devas lerni. Mi ankaŭ rimarkas ke lerni Esperanton estas pli malfacile por azianoj ol por usonanoj kaj eŭropanoj.

NASK havas altan valoron: ĝi estas ege utila kaj bona kurso por ĉiuj tut-mondaj geesperantistoj. Mi bedaŭras ke mi ne partoprenis NASK-on antaŭ multaj jaroj. Se mi estus pli frue partopreninta, mia nivelo estus multe pli alta kaj mi pli bone povus disvastigi la lingvon en mia lando.

Tamen, mi estas ege kontenta ĉar dum la kurso mi lernis pri multaj novaj kaj utilaj temoj. Mi ankaŭ sentas min pli kuraĝa por instigi al gesamideanoj partopreni ĉi tiun kursaron. Mi volas ke ĉiuj sciu ke NASK certe estas la plej inda kurso en la mondo, laŭ mi.

Ĉiuj programeroj estis ĝueblaj kaj ĉiuj helpis min altigi mian lingvokapablon kaj mian konon pri diversaj temoj, ekzemple, mi multe lernis pri veganismo, danke al Hoss FIROOZNA. Mi miris pri lia senlaca laboro. Ŝajnis al mi ke li neniam ripozis. Mi estas ege dankema al li pro lia sindediĉo al la sukceso de NASK.

Kia neforgesebla sperto! Bedaŭrinde la kurso baldaŭ finiĝos kaj mi antaŭĝojas partopreni ĝin denove. Ĉi tiu fojo ne estis nur mia unua partopreno ĉe NASK, sed ĝi estis ankaŭ mia unua vizito al Usono. Mi deziras danki al multaj homoj pro ilia afableco. Unue, al Ellen EDDY, Lusi HARMON, kaj Grant GOODALL, kiuj aranĝis ĉion por mia partopreno.

Danke al Mar CARDENAS, mia vizito al Usono komenciĝis ege agrable. Ŝi kolektis min el la flughaveno, gastigis min ĉe si kaj veturigis min al la kampuso de UCSD. Mi certe volas danki ankaŭ la bonkorajn geinstruistojn, Birke DOCKHORN,

Bertilo WENNERGREN kaj Liĉjo MILLER, kiuj tre ĉarme, pacience kaj inteligente respondis al ĉiuj miaj demandoj pri ĉiuj temoj. Estis ege kortuŝa la invito de David JORDAN por festi ĉe li, kaj la manĝaĵoj estis bongustegaj! Li estas bonega preleganto kaj la temo multe interesis min.

Nia honora gasto, Amri WANDEL, parolis pri la ne ofte diskutata temo de la eblo trovi vivon ekster la Tero, eĉ ekster nia sun-sistemo.

Mi volas elkore danki al Esther SCHOR, kiu instruis min kiel naĝi tiel kuraĝe; ŝi ankaŭ multe helpis min pri aliaj aferoj.

Dankon ankaŭ al ĉiuj aliaj geamikoj kiuj estis tiel amikemaj, helpemaj, kaj precipe, amuzaj... ☺

Longe vivu NASK! Mi elkore deziras al la programo grandan sukceson!

—Indu THAPALIYA



“Surplanka Ploro”

Jen teksto de la bela kanto, kiun Simono prezentis al ni dum la diplomceremonio. Ĝin verkis la mistera “Aĉjo” speciale por NASK! Vi povas aŭskulti Simonon denove en podkasto de Radio Verda (ĉe <http://radioverda.com>), epizodo N° 112.

Ĉirkaŭbrakas mi la plankon
suferante egan mankon
de amikoj meritantaj koran dankon

El okuloj fluas larmoj
pro memoroj pri la ĉarmoj
kiuj portis min en emociaj svarmoj

De l’ komenco vin mi sentas
familio. Vi aŭtentas.
Mi forlasus mian landon ĉar vi tentas.

Honte, kaŝe, mi nun ploras
dum malgaja kor’ doloras
memorante kial vin mi tre adoras.
Vi valoras...

Vi subtenis min, gefratoj
per kunĝojoj kaj kompatoj,
sed deziris mi ke restu pli da datoj.
Kun bedaŭro kaj deziro,
solidaro kaj sopiro,
ni preparis nin hezite por foriro.

Adiaŭis ni kun vorto
promesante ke, laŭ Sorto,
mi renkontos vin denove antaŭ morto.

Honte, kaŝe, mi nun ploras
dum malgaja kor’ doloras
memorante kial vin mi tre adoras.
Vi valoras...

Mi lamentas post vojaĝo
tre mallaŭte pri l’ miraĝo
kiu helpas vidi ekster mia kaĝo.



Nun mi scias malespere
ke ne eblas vidi vere
la vizaĝojn de amikoj ĉi-vespere.

Mi ne estas plena homo
sen amikoj. Jen simptomo
kiu pruvas ke mi estas nur fantomo.

Honte, kaŝe, mi nun ploras
dum malgaja kor’ doloras
memorante kial vin mi tre adoras.
Vi valoras...

Honte, kaŝe, mi nun ploras
dum malgaja kor’ doloras
memorante kial vin mi tre adoras.
Vi valoras—tamen foras.
Ĉu aŭroras? Mi ignoras kaj langvoras!

Vin, amikojn miajn, mi honoras...